

## መልክአ እግዚአብሔር አብ

**እግዚአብሔር** ባዕል ዘኢትነዲ ለግሙራ። ጎሩመ ምንዳቤ ወተጽናስ ወግብረ መከራ። ትቤ ነፍስየ ዘአፈድፈደት ቃለ ገዓራ። ያብዕለኒ ተሣህሎትከ መብዓሌ ንጉሥ ሐራ። ከመ አብዓልኮመ ቅድመ ለሄኖክ ወዕዝራ።

ኦ ዘትቤሎ ለእስራኤል ቁልዔከ። ወአበቀኦ አፉየ ምላዕ ስብሐቲከ ወይኩን መክፈልትየ ከመ እስብሕ አኮቴተከ። እስመ አምላክ ጽድቅ አንተ ዘኢኮንከ ድሩከ።

ኦ ከሣቴ ራዕዩ ለዮሐንስ ነቢየ ፍጥሞ። ክሥት ሊተ እግዚአ ለአንብቦ መጽሐፍ ወተርጉሞ። ወወጢነ ግብር ሐዲስ ምላዕ ለፈጽሞ። ከመ እንብብ ሕገ ዚአከ በልሳነ ሐዲስ አቅሞ። ዘአልቦ ጽርዓት ወአልቦ አርምሞ ።

**ሰላም** ለዝክረ ስምከ ስቡሕ ወውዱስ፡ ዘትሴባሕ ወትረ በአፈ ኹሉ ዘነፍስ **፪ማ፡ እግዚአብሔር አብ** እስመ አልብከ ተጽናስ **ማ፡** እምቅድመ ዘመን ዘመናዊ ወድኅረ ዘመናት ሐዲስ። እንዘ ለዘመናት አንተ ሕገ ዛሕን ወመርስ ።

**ሰላም** ለሥዕርተ ርእሰከ መድምመ ጽዕዳዌ ጽዕዱቱ። ወለርእሰከ ዓዲ ቢጸ ተባይዖ አልቦቱ **፪ማ፡**

**እግዚአብሔር አብ** አበ ጎሩያን ክልኤቱ **ማ፡** ፀሐየ ሥሉስ ዋህድ ሠርጐ ምልዓ ዓለም የሐቱ። እስከነ ምዕራብ ወወርቅ እምላዕሉ ወታሕቱ ።

**ሰላም** ለገጽከ ዘተሰብሐ ወተመዝገነ። ዘምስለ ክልኤ ገጸት እንዘ ያርኢ ብርሃነ **፪ማ፡ እግዚአብሔር አብ** ግጻዌ ኹልነ። ስንከ ለነ ተደሞ ምልዓ ስፍሐ ሰማይ ሰፈነ። ብዕላ ስብሐቲከ ፈጺሞ ከደነ ።

**ሰላም** ለቀራንብቲክ ወለአዕይንቲክ ብሩሃት።  
ዘኢይትጋወሮን ጽልመት **፪ማ፡ እግዚአብሔር አብ** አበ  
ብርሃናት **ማ፡** አብርሆን ለአዕይንትየ ከመ ኢይኑማ  
ለመዊት። እስመ ለከ ኃይል ወለከ ስብሐት።

**ሰላም** ለአዕዛኒክ አጽማዕያን ጸሎት ኩለሄ።  
ወለመላትሒክ ዓዲ እለ ተአጽፋ ነደ ሡራጌ **፪ማ፡**  
**እግዚአብሔር አብ** ዘትትዌከፍ ምልዕ ስባሔ **ማ፡**  
ተወከፍ ወትረ ጸሎትየ ወብሂሎትየ ኤሎሄ።  
ወአውይዎትየ ከመ አርዌ ዘይሰመይ ግሔ ።

**ሰላም** ለአእናፊክ መሣኸወ ጼና ርኅው። ወለከናፍሪክ  
ዓዲ አናቅጸ ንባብ ፍትው **፪ማ፡ እግዚአብሔር አብ**  
ዘኢትመውት ሕያው **ማ፡ እግዚአብሔር** ሳን  
**እግዚአብሔር** ታው። በኩሉ ወውስተ ኩሉ ለዓለም  
ህልው ።

**ሰላም** ለአፉክ ከመ አፉሁ ለአዳም፡ ወለአስናኒክ ዓዲ  
አስናን መለኮት ግሩም **፪ማ፡ እግዚአብሔር አብ** ህልወ  
ትካት እምቅድም **ማ፡** ዘትሄሉ ወትረ ድኅረ መጽአ  
ዘመነ ሐዲስ ዓለም። ምልዕተ ጸጋክ በስብሐት ፍጹም  
።

**ሰላም** ለልሳንክ ዘኢይነብብ በግዱድ። ወለድምፀ ቃልክ  
ሐዋዝ ድምፀ ነጐድጓድ **፪ማ፡ እግዚአብሔር አብ**  
አጋዜ ዓለም በእድ **ማ፡** ያስተናብበኒ በልሳነ ኩሉ  
ነገድ። እስመ መስተናብብ ብክ ጳራቅሊጦስ ነድ ።

**ሰላም** ለእስትንፋስክ እስትንፋስ ሕይወት ወጥዲና።  
ወለጉርዔክ ዓዲ ኖኅተ ለኖሳስ ወዴዴ ጉህና **፪ማ፡**  
**እግዚአብሔር አብ** መድምመ ልዕልና **ማ፡** ዘታበድር  
ጽድቀ ወይዋሄ ወግብረ ኩሉ ትሕትና። ትዕቢትሰ  
አውደቆ ለሳጥና ።

**ሰላም** ለጽሕምክ ለዘኢይትረከብ አቅሙ። መንክር ቆሙ ወዕሙቅ ክበበ ግድሙ። **እግዚአብሔር አብ** ለአሮን ከመ ጽሕሙ **ማ፡** አሠንዮ ለጽሕምየ በጠለ ረድኤት ዝናሙ። ወደመና ሣህልክ ሉዓላዊ ዘልዑል ምሥያሙ ።

**ሰላም** ለክሣድክ ዕበየ ግርማ ዘየዐውዶ። ወለመትከፍትክ ዓዲ እለ ሕልዋን በተዋህዶ። **እግዚአብሔር አብ** ክቡተ ኅቡዕ ዘእምተግህዶ **ማ፡** ኅብዓኒ በጽላሎትክ እንዘ ያስተናሥእ እዶ። አመ ከመ እሳት ወልድክ ያውዒ ክርዳዶ ።

**ሰላም** ለዘባንክ ዘኢያገምሮ ኪሩብ። ወለእንግድዓክ ዓዲ ምርፋቀ የዋሃን አርባብ **፪ማ፡** ባሕረ ጥበባት ዕሙቅ **እግዚአብሔር አብ ማ፡** ያጥብበኒ እምዕበድየ ለወልድክ ጠበብ፡ እስመ ነገሩ መድምም ወኪኑ ዕፁብ ።

**ሰላም** ለሕጽንክ ከላስስተ ጸጋ አተቦ። ወለአእዳዊክ ዓዲ መግቦተ ዓለም ምልዓ መግቦ **፪ማ፡ እግዚአብሔር** ክብርክ ዕፁብ ለተናብቦ **ማ፡** መድምም ጥቀ ሰሚያቱ በኅበ ዕዝነ ልብ ዘቦ፡ ወለመንግሥትክ ፍጻሜ ዘአልቦ ።

**ሰላም** ዕብል ለመዛርዒክ መዋዕያዌ። ወለኵርናዕክ ዓዲ በተሰናዕዎ ህላዌ **፪ማ፡ እግዚአብሔር አብ** መፈውስ ደዌ **ማ፡** ንድፍ ደዌ ዚአየ በሐፀ ፈያት አርዌ። ወግብርክ ያሕይወኒ ዘኮነ ማኅየዌ ።

**ሰላም** ለእመትክ እመታተ አምላክ ግሩም። ወለእራኅክ ዓዲ አኃዜ ስፋሕ ዓለም **፪ማ፡ እግዚአብሔር አብ** ብሔተ ሥልጣን እምቅድም **ማ፡** ዘህልው በልዕልና ዲበ መንበረ ነድ ወፍሕም። ወለእለሂ በየማን ወጽግም።

**ሰላም** ለአፃብዒክ ሕሩመ ሐኬት ለፈጢር።  
ወለአጽፋሪክ ዓዲ እለ ቀጸባሁ ለግብር **፪ማ፡**  
**እግዚአብሔር አብ** ወላዴ ጎሩት ወፍቅር **ማ፡** ወምላዕ  
ጾታ ኩሉ እምውስተ ሰማያት ወምድር። ዘትሜግብ  
አንተ እስከ የብስ ወባሕር።

**ሰላም** ለገቦክ መብረቀ ስብሐት ልብሱ። ወለከርሥክ  
ዓዲ ኢውሱን ራህበ መቅደሱ **፪ማ፡ እግዚአብሔር አብ**  
ወለወልድ ቅዱስ መንፈሱ **ማ፡** ኪሩቤል ወሱራፌል  
እለ አክናፊሆሙ ስሱ። ኪያስ ወትረ ይቄድሱ ።

**ሰላም** ለልብክ ጻድቅ ወየዋህ። ወለሕሊናክ ዓዲ  
ማእምረ ዘመን ነዋህ **፪ማ፡ እግዚአብሔር አብ** በአፈ  
ኩሉ ስቡሕ **ማ፡** እስመ ሣህልክ ወምሕረትክ ብዙኅ።  
የማንክ ለምሕሮ ኩለሄ ስፉሕ ።

**ሰላም** ለኅንብርትክ ዘመድምም ርእየቱ። ወለሐቋክ ዓዲ  
መንክር ሠርጐ ቅንዓቱ **፪ማ፡ እግዚአብሔር አብ**  
ንጉሠ ላዕሉ ወታሕቱ **ማ፡** ያቅንተኒ ጋጋ አርምሞ  
እስመ መዋዒ ውእቱ ። ለአርዌ ዐመፃ ፀርየ ከመ  
እማዕ ቦቱ ።

**ሰላም** ለአቀኃያዲክ አቀኃያጸ መለኮት ክቡድ።  
ወእብራኪክ ዓዲ ዘምስለ ሰጊድ **፪ማ፡ እግዚአብሔር**  
**አብ** ወላዴ ዋህድ ወልድ **ማ፡** ቀደሱክ በኅባሬ ትጉሃነ  
ሰማይ ነገድ። አመ እመንበሩ ተነጽሐ ዕድወ ደም  
ወእብድ።

**ሰላም** ለአእጋሪክ ዘያንቀለቅል ምድረ። ወለለኰናክ ዓዲ  
ዘምስለ መከየድ ኅብረ **፪ማ፡ እግዚአብሔር አብ**  
ዘእምቅድመ ዓለም ነበረ ፡ ወጸንዐ በተዋህዶ እስከ  
አስተጋብአ ምድረ። ወእምቅድመ ገቢር በለብዎ  
ዘፈጸመ ግብረ።

**ሰላም** ለአፃብዒከ ወለአጽፋሪከ አሠርቱ። ለተዋህዶ ህላዌ እለ ልጹቃን እመንቱ **፪ማ፡ እግዚአብሔር አብ** ለአዳም ጥንተ ሕይወቱ **ማ፡** ያሕይወኒ ሕያውናከ እሞተ ኃጢአት ከንቱ። እስመ ለሐይው ልብዩ ይፈቱ ።

**ሰላም** ለአካለ ቆምከ ኢውሱን እም አቅም። ወለመልክእከ ዓዲ ዘግርማ ራዕይ መድምም **፪ማ፡ እግዚአብሔር አብ** አበ ብርሃናት ግሩም **ማ፡** ቃልከ ወሕይወትከ ግሩመ መልክእ ወቆም። ለመንግሥትከ ዘአልቦ ተፍጻም ።

ኦ አምላክ ኩሉ እንዘ አምላክ ጽድቅ ባሕቲትከ። ወኩሉ ገበርከ በፈቃድከ **፪ማ፡ እግዚአብሔር አብ** አምጣነ ተጽናስ አልብከ **ማ፡** ምርሐኒ ፍኖተ ጽድቅ ወአለብወኒ ሕገከ። ወኩሉ ቅሩብ ወሥሩዕ በኀቤከ።

ስብሐት ለከ **እግዚአብሔር** በኑልቄ ዕለታት ወለያልይ። ስብሐት ለከ **እግዚአብሔር** በኑልቄ ክረምት ወሐጋይ። ስብሐት ለከ **እግዚአብሔር** በኑልቄ መዋዕል ብሉይ። ስብሐት ለከ **እግዚአብሔር** በኑልቄ ኩሉ ዘኢይትረአይ፡ ስብሐተ ቅድምናከ ዘልፈ ይነግር ሰማይ።

ኦ እግዚ አብሔር አብ ዕቀበኒ ወአድኅነኒ እመከራ ሥጋ ወነፍስ ሊተ ለገብርከ ዕገሌ ለዓለመ ዓለም አሜን።